



梅垞詩鈔卷四

暨陽 蔣 燮

綢州集



戊辰夏五于役婺州還過東藕塘東藕塘固一州  
之勝也爲金仁山先生讀書處有平山環之子  
姓建祠其上因聚族焉山坳有曲閣塘可百畝  
許悉栽芰荷每歲花盛開遊者冠蓋相望比予  
至適爲水潦所敗因卽事賦此

且發婺州城出郭纔十里宿雨洗殘星缺月墮烟水遙

望東藕塘隱約見涯涘惟時遭橫潦敗荷葉披靡汀墟  
集鷗鷺不見花破蕾上有仁山祠古桂尙餘幾聚徒老  
學究兩廡不盈咫指點曲閣處坡陀入邇池稚子解趨  
承村翁迎倒屣引我過曲廊花間雜耒耜坐我曲閣中  
溪山入平視牕虛倒影涵波光白如紙疎林互映帶彷彿  
秋容泚緬想前哲心天懷自瀟灑賓主成偶然清談  
揮麈尾輿夫促早行火傘疾如駛

由東藕塘至孝順街贈陳孝廉某

羣山如列帳雜沓火雲裏赤日開洪爐鼓鑄山石死于

役行其間燬若魚頰尾樹影相東西十里九停軌息肩  
孝順街故人相見喜倥偬具壺餐客座占流水惟時屬  
金饑四民呼庚癸况值夏畦病揮汗滴耒耜旣乏濟時  
才自慚襜褕子湯餅雜葱韭粗糲亦云美爲君盡一樽  
爰威淨如洗

登八詠樓

六朝餘蔓草八詠尙名樓穀水縈林轉蓉峯入座收溪  
山開罨畫太守擅風流棟宇齊梁舊憑高最上頭

由暨邑至綢州過陡子巖

羣山如排衙疊疊翠橫嶂出入坡隴間縱目恣眺望遙  
見陡子巖一峯自跌宕蒼翠間磽秃奔峭實雄放橫豎  
都不是鬱崛成殊狀其陽隣斗杓險峻更無上其陰斧  
削成何年施大匠句乘烏帶諸暨二山名間得此轉清曠肩  
輿十里行面面屹相向

### 五指山

陡巖行十里十里非一狀山靈厭常格幻成五指樣盍  
執支遁鞭鞭盡頑禿相若代五丁力鑿開幾重障伸手  
不得施屹立雲霄上儻隣玉女峰仙掌堪揖讓

### 戊辰八月抵家舟中有作

放棹晚風前乘舸得秋漲樹影倒晴波舟行樹影上旋  
歸自于役鄉園就咨訪暫釋手板勞川原樂幽暢將次  
見衡廬時向烟中望

### 舟行白露塘

問津採菱渡買棹趁樵風鷺點野烟碧霞燒秋樹紅好  
山時到眼佳處輒推篷鄉樹離離出家園指顧中

### 浴美施閘

在蕭山相傳爲西子入吳故道

紅粉來從越黃池霸滅吳至今湯沐地尙想臥薪圖掬

水雙橋合

兩橋

傳踪兩地俱

西子產諸暨之苧蘿山下有浣紗石遺跡存焉或云

產蕭山之苧蘿鄉兩地爭傳之五湖終泛處風韻屬陶朱

### 登吳山憩呂祖廟

我來呂祖廟瞻依呂祖像徘徊棟宇間曠然發遐想  
先  
生唐室胄天姿自邁爽棄家如敝屣撒手脫塵網十洲  
三島間遨遊凌泱漭三過洞庭湖人間等蟻壤擾擾塵  
寰中伊誰識瞻仰面仙不識仙過後轉模倣繪圖岳陽  
樓炯炯雙眸朗到處營樓觀名山傳示廣我今喚聾聵  
無仙將安放日伺丹轉爐不若錢挂杖左挹湖光駛右

瞰江濤瀆爛醉吳山巔騰身出浩蕩洪厓與浮邱一身  
可參兩

### 過錢王祠

五代無寧宇羣雄正亂譁中原紛帶甲此地遂桑麻雪  
舞潮頭弩風行陌上花誰能亂離際保國復寧家

### 秋螢

秋老螢光細猶餘燭火明點花空借影着葉冷無情斜  
白月波淡峭寒風露清飄零莎徑下何處度殘更

### 看梅雜咏

料峭春風作意吹隴梅消息到何遲寂寥天宇尋荒谷  
蕭颯寒林認幾枝孤嶠鶴歸雲暗處空亭人立雪來時  
期君越水吳山外獨立蒼茫有所思

獨探芳信度遙阡縮頸騎驢曉色天記得斷橋橫淺水  
曾將老樹倚吟肩一枝何處花妨帽十里寧辭泥滿鞵  
爲問梅花村逕路隔籬山犬吠朝烟

尋梅

枯枝偃蹇閱冰霜苔蘚層層束古妝瘦立空山惟有骨  
生逢絕處忽飛香破荒冷豔衝寒臘曠世丰神出老蒼  
種自何年忘甲子頻看歲歲報春芳

古梅

竹鳴松坪稱比隣偏從斜拂見精神栽來東閣無官樣  
是處南枝得早春清韻本來空色相淡妝尤愛出天真  
故園花事拋離久腸斷衙齋兩樹新

時隣署梅花兩株  
盛開

野梅香處拂征鞍曾記江南客裏看流水空山花自放  
凍雲殘雪畫應難旅懷對此愁無那村店留題句未安  
今日蕭齋續舊咏吟髭撚斷到更闌

冷蕊疎枝色色鮮看花到處便流連雪邨貰酒薄成醉  
驢背無詩亦散仙隔隴聞香尋古寺逢僧倚樹話寒烟  
此間題贈無他句五字珠林小洞天

觀古寺梅

天心復處返冰魂風信催成第一番  
小點破寒驚昨夜  
高枝冒雪出前村垂來玉手看無恙  
皴入烟光乍有痕  
雅愛渡江兼柳色外間凡卉不須論

早梅

冰作胚胎玉作膚生來幻質本清癯  
極憐別調吹黃鶴  
轉憶韶華似綠珠庾嶺春光成黯淡  
羅浮仙夢已模糊  
落英飛繞雲屏上猶作迴風舞雪圖

落梅

天然逸格費推評辜負名花是廣平  
露冷霜清殘月曉  
亂山孤店一枝明相看癯瘦應憐我  
修到清虛有幾生  
不着纖毫烟火氣更從何處締詩盟

暗香時引到筠菴屐印蒼苔幾度探  
小剪一枝驚歲暮  
嫩寒春曉憶江南攜來淨几宜斜插  
細數明珠尚半含  
隨意山牕清供外摘將餘朶帽簷簪

瓶梅

出手亭亭茁異葩誰能貌此雪中花  
軟紅凡豔去千里  
瀟灑風流成一家夢繞寒香詩思苦  
醉摸疎影墨痕斜  
巡簷幾度神追處掃盡霜箋筆似鴉

畫梅

雲階霞閣趁敷榮自昔揚州獨擅名  
屈榦寫成書瘦硬  
疎花點出玉晶瑩移來認得仙人種  
寄去曾憑驛使程  
安得林間旁舍地仰看月落與參橫

日日探梅恐後時一般幽景少人知行吟曲澗藏春隴  
坐愛荒村挂月枝土屋茅簷看亦好映籬夾竹景偏宜  
山家不解修花事贏得兒童牧笛吹  
山眉水曲憶清徽楚客幽魂是也非有韻生成九仙骨  
不寒疑着五銖衣玉鱗直欲凌風去縞袂翻從拂地飛  
繡閣紅樓無處着獨憑空翠插烟霏  
枝南枝北盡珠璣逸格難將曲檻圍淡到無言成獨笑  
春來何處得先幾寒條亂插荒籬密素影遙烘夕照微  
最愛營邱圖畫裏雪林如海廠荆扉

擬向清溪築草堂不將桃李鬪新妝三間屋裏隨君隱  
鄉先輩王竹齋隱九里山樹梅千株築室三間自題爲梅花屋九里山前是我鄉紙帳  
留春娛晚歲銅瓶分韻領幽芳他年載入名園記前輩  
風流許辦香

巖少峯郡伯命題三餘書屋圖卷

汲古之綆何處求積書充棟出汗牛花晨月夕等閒度  
昨日之日不可留昔賢游藝重三餘甲乙縹緗資校讎  
但得其餘何論三琴樽之暇足討探游息高明有心得  
指陳六經如指南玉堂仙吏斯文矩五馬東來徵渡虎

好古游心竹素園依山特建圖書府政成大載協亮寅  
時手一編餘旁午蒔花拭竹賞幽勝赤嶺雲峯自賓主  
昔時六一醉翁亭籃轡酪酏酒不醒亦有樂天虛白堂  
衙退枕琴來撫牀何如此屋命名古絃誦清芬學鄒魯  
爲圖作記示後賢瓣香繩繩應繼武

正月十五夜解衣就寢矣邑人擁燈驟至繞堂而  
去因爲長句寄之

歲在戊辰日壬子入春七日惟上元芳辰令節各成賞  
菽齋寂寂如邱樊先生飽飯出捫腹當空皓月懸金盈

拄杖久立看天宇入門高臥辭煩喧錚鉉金鼓動地來  
魚龍百變隨風雷繞場掀舞幾匝回飛石驚門門不開  
黑甜之鄉夫何有如聞蠛蠓之聲相排逐童子牽衣急  
起追揩眼不見相疑猜月光如水浸堦砌但見竹柏之  
影籠蒼苔

雨中漫興

雨中青草長如麻苜蓿荒齋亂吠蛙纔有詩懷忽飛去  
快乘餘興寫黃花

睡起戲題

殘年老而憊支枕黑且甜三萬六千日何如一寤眠覺  
來盼楹前柳絮飛翩翩落硯池蘸水如輕綿茲硯  
久荒廢蛛綴塵封函一丸墨如豆筠管久退尖兒童偷  
紙去座上無完牋得句無處寫拾來葉如錢寫向殘葉  
上猶帶露色鮮諷吟一再過銜杯樂陶然

和人春草原韻

彌望寒蕪剩宿根生機不斷有芳魂一番雨過青埋屐  
幾日風吹綠到門深淺疊成鋪地毯蒙茸織就出天孫  
烟光滿眼傾壺坐何處重尋舊燒痕

喜晤陳六東生

一株玉筍風塵表邂逅逢君恨不早居停主人頻說項  
瞥見新詩爲傾倒邇來披讀巢雲編山陰何雲子詩稿  
多贈貽東生之作  
始識榮名共推寶飛章騰檄才出羣淥水紅蓮詩更好

雲子贈詩有淥  
水出紅蓮之句

羨君眉宇氣凌雲愧我形容日枯槁自  
笑郎當與俗殊不惜蓬門爲君掃今雨知君來不來速  
先示我陔南草

苦寒吟

積雪蔽大野皚皚耀勁質謂當見覘消嚴陰經旬日獄

有凍死囚巷有空洞室沾酒踏雪行蹒跚如跛鼈稍救  
一宵寒無奈衾如鐵學作號寒蟲呻吟出蓬篚呵指寫  
新詩筠牋冰折筆

過牆花

一樹過牆花其下兩家住東家方團欒呼作合歡樹紅  
袖圍芳樽朝朝復暮暮西家方別離謂是斷腸花花片  
隨風去幾時客還家

跋巢雲閣詩鈔贈何六雲子

昔歲丙寅冬初識何雲子惟時倥偬中握手立談耳暇

時飲我槐市間爾汝形骸忘彼此我探豎山蕨君飲鑑  
湖水相逢薄宦途識面從茲始盎然古道照人顏肝膽  
今知向君是倅來遺我瓊瑤編齒芬牙慧顏色鮮言光  
片羽已足貴况睹鄧林之玉森聯綿嶽岵歷落窮愁志  
促節曼聲皆古意若非游心物外天何由直造古人地  
沉吟三復讀終卷令我滂沱出涕泗抑塞磊落之氣不  
可見但見騷客心羈人淚游女懷神仙戲百端交集風  
雲思來如黃河之水天上落千孔百竅灌輸傾瀉併入  
蠅頭字雲子雲子爾毋爲此徒勞神真宰上訴天爲瞋

逞爾模山範水追幽鑿險之餘力搜盡雲籤秘笈諸子

百家之粹純胡爲窮年著書初平牧羊之荒谷時雲子爲金華

司折腰五斗之米拖儒紳門生菜把不時供惟有百千

之卷撐腸挂腹盤輪困我始爲子嘆繼且爲子賀使爾

擁多金日操竒贏貨乘堅并策肥顏面不直唾無寧首

藉齋秀句出寒餓使爾上玉堂文昌有輝光手持敲門

磚力摹官樣裝腦滿腸肥一俗工安能英詞快句馳康

莊浸假擁節旄富貴驚其曹橫金拖紫意氣豪粉白黛

綠陳香醪生成混沌不肯死安能出入爾雅追風騷雲

子爾無謂我言之訛爾飲我酒我爲子歌窮達由命非

由他五窮例無詩一科窮而後工理則邪吾將左攜冰

雪篇右挈鸚鵡螺從子終老兮巖之阿慎勿騎驢覓句

犯鹵簿醉吟恐遭官長訶

雜詠

文章爲心聲如面不相肖洪纖與險易造極各臻妙于

文必已出斯語實體要卽此是辭達上可薦郊廟古音

法鐘呂毋爲蚯蚓竅倩盼出天真勿學齟齬笑醯鷄舞

甕中不知兩儀曜枝枝節節間寧識神龍掉請展冬烘

眼更上一層眺

逆旅

逆旅刺世家記事也

天地爲逆旅何況庇一椽所以曠達士環堵亦陶然魏  
魏洛陽宅軒軒臨九廡閼閱積勲舊堂構垂百年良辰  
設宴會賓從如神仙有客投刺入驀然闖華筵掉弄三  
寸舌舉座愕且悵爲言廣基址出入主所便形格并勢  
禁悲憤不得宣黠燧利主使往往嗾嗾咽百年勲業第  
一朝爲移遷鳩工興土木甲第相鉤聯堂階羅芍藥水  
檻栽紅蓮輦石構絕壑駕梁疏流泉時聞高車過夾道

聲闐闐曲廊兼阿閣曼睪藏嬋娟下鑿白銀塹旁輝金  
簿博貨寶積如山孰能擣其堅誰知累卵勢榮辱如轉  
圓象齒必焚身機伏強弩先駭顛大第宅一朝盡棄捐  
寄語卜居人莫隣勢豪阡晏子辭爽塏千古師其賢寄  
語勢豪家莫矜勢豪權高明鬼瞰室天道多好還

咏史

興亡潛兆杜鵑知南相登庸社稷危誤國自從言利始  
滔天早定辨奸時羣兒紹述留餘孽一老云亡遂不支  
私測周官無用處空將經義註幽詩

半山疏幽詩一則最爲醇正

自題畫竹

此生不作封侯想安得渭川千畝寬只寫數枝張素壁

翩翩逸態任君看

史記渭川千畝竹與千戶侯等

昨夜筠枝月映廊幾回摹寫不成行醉來潑盡三升墨

葉葉枝枝帶酒香

耐此三冬雨雪侵龍孫驀地長千尋風枝雨葉憑君寫

難寫虛中一片心

舍前舍後皆叢竹不數千竿與萬竿滿院秋聲聽未足

張牋猶畫數痕看

梅垞畫竹不似竹戲寫鶯溪三百幅張向高齋日午時  
但覺秋聲滿空谷

自笑胸無成竹詎云得心應手但知我用我法不落畫  
工窠臼

多處能消夏迎風韻更清君看墨數點點挾秋聲

畫竹無成法橫斜始逼真孤山咏梅句借取竹精神

林和

靖咏梅疎影橫斜水清淺本南唐人竹影橫斜水清淺之句

新秋晚成

拄笏看山久閒園傍晚過微陽烘暑薄小雨送涼多竹

濕螢流火雲行月歛波水泉鳴泱泱一半注田禾

陂塘納涼

六月陂塘好涼風滿葦汀亂荷翻水白一鷺立烟青垂  
釣每孤往行吟日再經有時聞款乃高唱入溪亭

秋日懷友人不至卽景有作

秋生寥廓地人上最高樓雁字因風斷雲羅避雨收長  
天彌遠望之子竟淹留撫景增惆悵空懷杜若洲

秋宵漫興

閒寂良宵永閒情寄短檠客爭棋一角僕倦漏三更唧

唧蟲鳴壁啾啾鼠齧籬手添茶鼎水索句復高吟

繡湖春眺竹枝詞

婺州東畔是綢州一曲平湖漾淺流不着尋常桃李面  
冶春風景似清秋

行人荷擔滿春堤小市喧闐繞水湄社鼓鑿鑿山客去  
羣鴉飛過六賢祠

麥隴青青菜隴黃明霞澄霽水雲鄉天然金碧相輝映  
只少樓臺倚夕陽

陂陀如帶亦如環低繞平湖杳靄間笑指春雲生處處

遙天遮住石樓山○  
拂水和風面面圓○春山倒影入淪漣○儘教游女挑絲取○  
難繡風中蕩漾天○

雜詠

種桃味得甘○種李味成苦○木之神不二○由種不由土○胡  
爲斯人儔○有子不肖父○惟人最秀靈○遜茲草木腐○人物  
不同稟○此理孰能剖○

網緼造化中生人○復生物號物○數有萬罔○勿爲人屈操  
之得其理○勞絲成綸○綉製或乖其方○純錦不成綬○况人  
類不齊○剛柔各異質○惟以人治人○庶幾物還物○

食土只成埵○食葉能吐絲○泥塗塗附中○穎秀茁菌芝○織  
素光燦燦○汙垢遭棄遺○莫恃鮮明質○一涅不可追○莫棄  
臭壤材○臭腐爲神奇○

春陽來何處○乃在冰雪中○天道剝而復○四時週無窮○人  
各具一天○視天何夢夢○坐盡火銷膏○聰明成瞽聵○一剝  
不復返○塊然相始終○

羲爻啓一畫○衍成充棟書○六經炳三古○日月行天衢○秦  
火焚燒後○聚訟如榛蕪○子史百家外○煩言人人殊○濫觴

逮詞賦篆刻雕蟲魚山經并地誌神仙雜浮圖載之車  
折軸挽之牛汗膚百千萬年後浩繁更何如或者元會  
週復還一晝初

古詞尙含蓄餘味曲留半韓柳及歐蘇汪洋無畔岸如  
承太素後五采資炳煥如挹太羹餘五味得薪爨一二  
妄庸人強將頭面換淮風與別雨摺撫復點竄腐木濕  
鼓音豈足遺三嘆不讀唐後書渠真是鈍漢

古妝尚簡質今妝貴燦爛美女老溷妝今人應齒粲一  
回新一回時換服亦換所以藝苑中文人喜翻案

編氓撻羅網窮極則計生以法繳繞之弊卽緣法萌遂  
使聽獄吏顛倒不得情用法平如砥龍蛇化赤子繩法  
如亂麻赤子爲龍蛇

儲兵先儲糧備戎當備疆治民先治吏除弊當除殃揣  
本不齊末綱舉目自張古之神明吏悃幅無他長

魚行日在水不見水中濕龍穿石窟過不見石有迹如  
人行氣中不知與天一人自離其天寔成地下魄惟有  
聖賢徒浩然氣充塞卽此是飛昇何事言拔宅

讀史雜感

我思魯仲連披褐恥帝秦掉弄三寸舌一掃咸陽塵俯  
視儀秦徒厥詞何狺狺千金却不顧高蹈東海濱縱橫  
捭闔中乃見有此人見首不見尾龍性誰能馴

楚國有遺老忠悃遭棄捐告君不見答搔首乃問天幽  
思發哀豔介節終沉淵漢魏晉唐宋詞客如雲烟沾丐  
殘膏馥逸調俱翩翩師詞不師志何處追前賢惟有浣  
花翁筆大如修椽窮途哭蒼生上追三百篇

李斯荀卿徒乃爲趙高耦一與沙邱謀終身成掣肘富  
貴念稅駕面諛工鑿曰欲阿二世意終敗三川守得時

感蒼鼠失時哭黃狗

古人勇改過夕念不待朝勃然赴道義迅流無停橈昨  
日惡少年今日人中豪赴險特餘事如以火燎毛手持  
三寸鐵可斬長橋蛟

荆公辯且堅計醜文獨贍新法始青苗周官資稗販若  
生衰周時卯也可合傳不遭宣聖誅漏網倖逃譴惟有  
蘓老泉辨奸由喪面

丁卯正月十九日作

一雨幾匝月潛居似蠖蟄此後卽長晴春去日二十况

復寒食近輕陰易相襲趁此嫩晴時清游倒懸急杖策  
登高阜眺覽傍城邑綠意出寒蕪祥風扇廣陌柳條青  
猗猗曉鶯語猶迴輕勻卵色天愛此峯巒集妙境取春  
淺寧辭屐齒濕緬想斜川游蒼茫久佇立

上巳日作

宿陰久不解春風峭平陸紅樹落高花飛英裊瘦竹佳  
節瞥眼過蕭齋自幽獨舊雨期不來誰歟共春服手持  
陶韋詩紛披落花讀小坐聽鶯鳴春烟滌寒綠

閒中戲作

十日摹一帖五日成一詩東塗西抹總嬾散不如載酒  
臨清漪繡湖之水何洋洋上有高松千尺長柳洲花島  
遺跡古澄然倒映凝清光人生能着幾兩屐石火星飛  
駒逝隙中原文獻北邙紅六代繁華秣陵碧風光到處  
足流連佳景良辰漫虛擲有花堪折直須折有酒便當  
浮大白君不見花香滿谷酒滿缸喚不醒奄奄泉下魄

咏史

周以東遷弱宋以南渡亡等觀覆轍跡千古遙相望或  
謂失地利亦由守偏疆二者固云云厥謀未爲臧西北

士馬雄東南財賦強地利各有便形勢徒較量一旅能  
復夏五遷亦興商徒以疆域論其說亦未長周自黍離  
降奄奄氣不揚犬戎肆喋血惟申實披猖忘却戴天仇  
猶爲設戍防賄贈及魯妾金車敗王章國本既已失天  
王狩河陽有宋遭播遷偷安來錢塘心腹失宗李謂宗澤李  
綱掣肘惟汪黃謂汪伯彥黃潛善岳侯實天挺力能掃欃槍唾  
手燕雲議大義何煌煌和議任賊檜厥病沉膏肓一德  
格天閣矯誣穢上蒼賢奸既倒置莫挽浮海航惟天有  
設險形不隸職方蕩平復正直仁義爲康莊綸之爲九

法經之爲三綱喜則飾禮樂怒則威斧斨放殛俾大慝  
爵賞褒忠良皇王帝霸國到處成金湯茲險雖無形固  
圍周八荒操持失其守四維乃不張徒講地域險補牢  
先喪羊况并地險失國勢何由昌弗謂蕞爾區可以毀  
城隍

六十初度

稅駕綢山兩載餘逍遙何事待懸車籬花補種從僧乞  
詩稿分抄屬吏書六十光陰同逝水數間傳舍卽幽居  
鄉園咫尺無多地別墅何須更卜廬

廣麗庭明府戲謂予官綢州猶居別

業也

漫說閒中一事無，強將晚景慰桑榆。  
手簽書軸裁紅紙，膝坐嬌兒弄白鬚。  
藥酒試嘗成薄醉，瓶花供養足清娛。  
羅陳棗栗開家宴，上座居然屬老夫。

北郭吟贈張巢閣文學

翻

北郭之山綢且迤，北郭之水何漪漪。  
滙爲清湖繞郭去，綺綰繡錯呈靈竒。  
中有幽人負郭居，厥廬乃在湖之湄。  
旦出汲暮讀，古人書大放厥詞。  
如瓊琚五試棘闈，掉頭去闔戶窮經。  
賦遂初，侍親北堂上，定省怡怡隆色養。  
交

友如飲醇濟困扶危，一指困肝腸誓不因人熱。  
繞指柔中有寸鐵，赴義勦公氣轉豪。  
千金揮灑輕鴻毛，我從括

蒼來

余攝篆麗陽迨丙寅赴任綢州

悶懷無時開，黃茅白葦中覲此翹。

楚材一見渾如舊，相識造廬促膝日幾回。  
千頃之波不易挹，玉山朗朗真竒瑰。  
有酒醕我北郭廬，與酣倒盡千玉醅。  
丈夫遭際難適意，往往鹽車困騏驥。  
感君豐玉不逢年，借箸前籌數往事。  
我昔困頓諸生中，青衫時拭窮途淚。  
七篇勦說附賢書，十載風塵偕計吏。  
橋霜店月馬頭燈，勞勞四就春官試。  
鸚鵡裘敝賦歸來，一檄東馳居

散地窮年埋首數蠅頭。到戶何人題鳳字。多君氣誼高  
如雲。時時披荆來論文。搜索枯腸思一得力。排衆說爲  
解紛。我爲北郭吟樽前。歌變徵莫嘆悞儒冠。勸君惜寸  
晷。雖停六翮息鯤鵬。轉瞬三春發桃李。繼自今業方始  
旦晚期君取青紫。

題丁藕汀春宵行樂圖

昔年四走燕山北。店月橋霜我舊諳。此處頓開新眼界。  
杏花樓閣認江南。

題虛舟行樂圖

去住無心免歛張。扁舟空洞水雲鄉。何如掉却凌波楫。  
撒手騎鯨入大荒。

讀某集

儒冠而紉袴。風雅何翩翩。披其等身書。多贈官人篇。頻  
投大老府。持作敲門磚。載之貨殖傳。壟斷勝市廛。揆之  
薄俗論。名士值幾錢。

學圃漫興

菊圃空如洗。菊圃爲水所淹根株一空蕭齋秋正闌。學書收柿葉。得  
句刻筠竿。事業輸閒處。生涯笑冷官。俸錢餘剩貫。便欲

買花看

斗室剛容膝莎階地轉寬  
觀花思補石亞竹半圍欄  
舊

畫愛臨稿近寫墨竹多仿舊本  
好書常借看此間容半隱  
未盡誤

儒冠

懷知詩

菽齋寥寂諸無繫念惟歷溯  
平生知愛未能去

懷綜計隱顯存沒自尊宿以逮  
交遊得五古

十六首撫今追昔觸緒而成不計  
詞之工拙也

嘉慶己巳九月二十六日

座師金總憲聽濤先生

我生自田間不熟等蕘稗束髮  
學觀場遲久羽毛鍛每

當揭曉晨心魂入魔界傾耳希  
好音風聲雜鶴唳攬鏡

二毛侵頗自慙襜襪我師廣搜  
羅瓊琚兼玉佩拮撫到

魚目儼厠明珠隊謂字準低昂  
權衡得其配三藝道津

津舉以示流輩先生評余孟藝云如權衡輕重一生平字不可低昂至京邸猶爲人道之

知己恩惟此實爲最其奈陸莊  
荒難答師恩沛垂老博

一官依然窮措大每思斗酒攜  
無由墓前酌

座師曹大司徒儷笙先生

父母生我日日望成子名惟師識拔之恩同父母深新  
安曹夫子乃與吳江倫聽濤夫子溫言一獎借短褐增  
光榮偶質一二藝評隲語諄諄招飲到夜闌披豁形天  
眞時向半截街先生京邸在南半截衛街驢車聲鞦韆可憐老門生  
無顏望後塵

房師邢明府自軒先生

到眼迷五色積卷等薪束擢我白袍中敝帚充珠玉遂  
使囊中錐居然脫穎速抉摘紕謬詞細膩爲礪琢猶分  
橐中金公車資水陸丙辰與計偕詣會稽署辭行先生贈以資斧望我雁塔

名藥榜繼芳躅飲食教誨之是惟公所獨會稽一揮手  
音問久寂寞何日來之江日望隴西鵠先生于長興任滿加級回籍候  
陞

外舅章明經揆初先生

變也少失怙廢學嗟已久童試幾卅年往往落人後望  
我博一衿惓惓惟外舅亡室爲予言晨夕常在口縱論  
至文藝淵源遞分割先生少受業于梁薊林太史之門與山舟侍講相切磋嘗爲指陳源

流媿媿杯酒間欲起時捉肘予得敲門磚公若掃愁帚  
招我館瓊瓏倪萸江宗伯題先生書齋曰瓊瓏山館柳州實師友謂仁和柳彤勳

生先緬懷啓迪心感恩得未有遙望雉隴雲不堪屢回首

舅氏瞿明經廉泉先生

舅氏抱潛德高隱清溪濱早棄八脚詞詩古含精醇垂

老授生徒一一蜚英聲瞿鑒齋孝廉子臯太史皆出先生之門游庠者歲有其人圖

史滿東壁名花羅南榮晚構淨香居修篁夾疎櫺時來

幽齋坐手持冰雪文謂予子來前童外知相親即今一

瓣香渭陽經指陳石筍峯蠹蠹玉溪水粼粼巋然魯靈

光後生有典型

布衣俞杏村先生

昔人有高行採筍置籬外先生輒傲之生事坐此替日

聽東隣嘲俯仰有餘快時吟一篇詩清風發爽籟帛書

赴閩招李太守浚源聘主西席松雲太守其及門也拂意旋反旆欠伸屋打

頭放眼乾坤大引我忘年交春風接和藹至今企芳躅

斯人不可再

王廣文紺園

剝削支離詞紬繹湛深理搜羅萬象寬鞭辟使入裏吾

友王紺園行文工此技壯遊返珠江黃金買圖史卜築

琴隴中造廬留我止宿逋來逼人棄之如敝屣十年作

儒官滿飲甌江水垂老學長生紺園暮年講金丹未成

死一子奮

天衢紺園三子海觀文章有種矣登己巳科進士

朱明經鳳林

我家十畝園有亭臨水曲先生主講席門館常蕭蕭落  
落瓊瑤姿磨礪去圭角如見黃叔度千頃不可掬如逢  
王彥方知名甚鞭朴文章孕經史不詡便便腹一生精  
銳心始終近思錄

南城吏陳子九榮

策馬春明門黃沙滿征蓋茫茫人海中孰是居停地恂  
恂陳夫子風塵隱下吏知我故鄉來欣然為執轡一聞  
鄉語好頓忘羈旅思寢我賓齋牀殷紅炭新熾餽我郁  
厨餐芳香餅柔脆敘話到更闌二子拱而侍故鄉親串  
間少此纏綿意創遇一朝合遂成終身契遙望黃公壚  
臨風一揮涕

受業師家文學澹翁先生

吾宗世力穡中葉知詩書文詞狹邊幅繩削拘一隅先  
生詣超悟逐兔不守株行文縱鞿勒肯作轅下駒謂予

露頭角識我髻齡初教以罄控法俾之識軌涂惟變少  
跡弛摺撫入榛蕪自此日就範駸駸四達衢是爲發軔  
始勉強能操觚今成白頭翁感此一長吁

錢明府宗榜

十赴禮部闈力盡車裘敝一朝遭拔擢去作江西吏單  
車二僕徒匱匱獨行邁逆旅爲予言昨朝此停旆比予  
返鄉國一年凶問至聞君令德安廉聲頗遠暨綰符未  
及朞斯民有遺愛告假居旅邸溘然竟長逝廉吏不可  
爲貪墨遭吏議廉吏而可爲逋券積盈筭知君冰雪操

平生有砥礪綴筆待輜軒採入循良誌

同年莫總憲寶齋

丹穴有瑞鳥其名曰鳳凰毛羽備五色一鳴天下昌翺  
翔千仞上凡鳥無文章君爲諸生時與君相頡頏較藝  
赴課期時同肄業叢山小子參雁行東臯竇夫子望君識榮光

薦列通

閭闔衡文歷八方榷楠杞梓材嘗以一尺量我居京邸  
時君方隸庶常過我委巷中笑坐八尺牀踞轉寓無坐  
椅君坐  
上衣裝談往事爲我卜否臧君勸予  
就教職我愧鸞鳩飛決起捨

榆枋望君雲衢上彩翼垂天長傾聽律呂聲嗵嗵鳴朝陽

柳文學彤勳

邂逅富春山一見如舊識我時坦東牀君來主西席君設

教璣瓏山館畧忘丈人行君與予外舅為通家生傾吐瀉胸臆贈我新

詩句秀語奪山骨佐以舊隄糜其光等蒼璧况逢佳山

水高軒俯寒碧同遊滌硯溪散髮弄涼月君返西泠棹

我作北行客動如參與商音書竟沉寂屋梁月落時猶

疑見顏色

布衣呂大山先生

先生得竒疾十年臥床第下帷抱隻影襍被擁書史飽

餐蠹餘字不食齋厨米論文無古今所求惟一是一目如

搜壁電真偽辨脉理直于無字處推尋到骨裏門多問

字車紛紛請涂軌戴東山太史嘗于數百里外馳使就正其餘請業擢魏科者相繼先

生指示之劃如犀分水溧墓被侵佔輿卧走千里陳情

一帑詞哀慟驚邑宰先生有祖墓在溧陽被人侵界輿疾赴理邑宰閱控牒大驚朗誦之

事得文章流至性感孚有如此覺宮無姓名空山羸疾

死

同年何比部藍成

昔日游芹宮偕君觀釋奠聿惟歲壬子及爾同秋薦聯  
轡上春明記程歷郵傳雪虐兼風饕寒威裂人面惟時  
有戒心君車獨後殿勢若岑苔依跡如形影戀猶憶丙  
辰榜君來淚如霰艱難氣益增旋踵捷文戰君已鵬入  
雲我愧駒困轍過君官舍談勸予加餐飯屈指溯往踪  
流光驚飛電九載滯音書三秋望鴻雁

傅舍人篁山

英英瓊樹枝瑩瑩好顏色瑤圃方敷榮罡風遽摧折哀

哉傅舍人念之心愴惻君方總角時邁往有器識弱冠  
掇巍科龍門掉尾疾

扈蹕出侍

輦

綸扉入載筆去以九萬里謂當六月息誰知頃刻花忽  
隨泡影滅嘗論造物幻成事最難說只此數才人落落  
少儔匹豈惟地下少天上亦難得故遣白玉符名供修  
文職雁塔不題名鶴馭隨使節我託傾蓋交陳跡怕縷  
述約畧作哀詞伸紙數行泣

作懷知詩後夜坐自遣

安排詩課消涼夜耿耿星河參未橫  
靜院牕深燈有味空林葉落月無聲  
荒雞振翮催殘漏饑鼠窺人上短檠  
改罷吟牋復惆悵一生知愛未忘情

又題二絕句

晨星零落知音少舊雨淒涼入夢多  
消遣殘年須底物一番老淚和悲歌

逝者徒傷薤露歌生存回首渺山河  
眼前敢說無餘子姘女應嫌老阿婆

